



Jumat, 19 Pebruari 2021

Ogen: Jeremia 48:11-25



Gegeh Si Enggo Bene



Anak kuta Moab, meganjang ukurna erkiteken nai-nai nari aman kutana. Ia pernah bangsana iangkut ku negri pembuangan bagi negri-negri si deban atan pe bangsa Israel. ibuang ku negri pembuangan e jadi sada kebiaren man sada-sada bangsa, sebab ije kebenen daolat bangsa e, janah rakyatna kerina igelari budak. Erga diri sada bangsa lanai tama kiran adi kin enggo iangkut ku pembuangan e. Lit i je sada kebanggan man bana kalak Moab, i ja ia nembah dewa Kemos, nina dewa enda si erbahansa ia selamat. Dewa Kemos ikatakenna pe dewa keselamatan. Kala Moap iandingken desken anggur si entebu, si teneng la pernah iuseken ku guci si deban. E maka la sambar-sambar bauna, nanamna pe tetap entabeh. Teridah kebangganna man dewa Kemos si erbahansa turah oe kiniganjangen ukurna.

Kiniganjangen ukur e labo mereken ulih si mehuli, gegeh Dewa Kemos si ianggarken kalak Moab labo tahan rasa lalap. Enggo seh paksana Dibata ngukum kalak si meganjang ukur, Dibata erbahansa mela akap kalak Moap, sebab Kemos si ibanggakenna e iripukken. kalak Moap si erpengakap maka ia tentara si mbisa, keru igelehi. E maka erkadiola me Moap nandangi dewana Kemos si e kin sedekah enda ipuja-pujana. Teridah ije maka kai si sedekah enda akap Moap ergegeh, gundari lanai ergegeh, tentara si ndube akapna mbisa la kepe lit gegehna. Lanai lit ingan penundalen seakatan erkadiola ras mela.

Bagem ulih adi make gegeh si lit i bas doni enda. kentisik banci mereken kemalemen ate, tapi kedungenna mela, tangis, erkadiola ras meripuk. La kal ate Tuhan ngena kita make kuasa-kuasa doni enda. Iukumna me kerina alu la erndobahen, anak-anak, diberu-diberu seh ku orang tua kerina nge ikernepen.

